



Venderdis vargau a sia ordinaziun sacerdotala ei pader Murezi vegnius recepivs ella retscha dils spirituals.

FOTOS DANI AMMANN/CLAUSTRA MUSTÉR

## «Sia ordinaziun dat nova veta alla baselgia»

Venderdis vargau, ils 12 d'avrel 2024, ha la claustra da Mustér astgau festivar l'emprima ordinaziun sacerdotala dapi biebein sis onns. Pader Murezi Casanova ch'ei oriunds da Cumbel ei vegnius ordinaus d'uestg Joseph Maria Bonnemain en ina rama d'ina messa festiva. La FMR ei stada presenta e ha tschintschau cun il niev pader.

TONI VINZENS/FMR

Adina puspei ei ina trocla da glicud sefurmada entuorn pader Murezi Casanova ed el ha stuiu dar maun, plaid e fatg da tuttas varts agl aperitiv suenter sia ordinaziun sacerdotala venderdis vargau. Igl ei stau ina situaziun nunusitada per il giuven Lumnezian da 28 onns. Mo igl interess era gronds ed ils hospis digl aperitiv ella sala Peter Kaiser dalla claustra da Mustér han viliu gratular e saver dapli dil niev pader che ha menau ina veta pitost retratga ils davos ot onns sco conventual.

Quei semidi denton cull'ordinaziun e la claustra sacerdotala, sco uestg Joseph Maria Bonnemain ha detg. El ha numnadamein accentuau durant l'ordinaziun ch'in spiritual sappi buca semplamein sereter en in tempel: «La veta claustrala munta buc izolaziun.» Cuzun il contact cul pivel seigi essenzials, era per perdegar igl evangeli – e gest quei vegni ad esser in dils pensums principals da pader Murezi che ha tochen uss passentau il pli bugen siu temps el curtgin dalla claustra da Mustér, sco el sez ha detg: «Jeu sun da cor hortulan.»

### Da Cumbel a Mustér

La pissun per la lavur en curtgin da pader Murezi denton gia anflau duront sia giuventetgna ella Lumnezia. El ei numnadamein oriunds da Cumbel, ha frequentau las scolas a Cuschnaus e Vella e fatg in emprendissadi da hortulan. Sco el ha detg, dettien la lavur ed il ruas ella natira aunz oc forza ad el.

Sia via ha pader Murezi denton buc anflau cun siu emprendissadi e sco hortulan. Suenter il survetsch militar seigi numnadamein la damonda suenter il senn dalla veta vegnida adina pli presenta – e zacu seigi ei stau clar per el: «Il senn dalla veta ei dad esser sin via cun Diu. Per quei

sun jeu sedecidius d'entrar en claustra.» Quei ha pader Murezi lura era fatg igl onn 2016.

### Ora et labora (et lege)

Silsuenter ha pader Murezi viviu en claustra da Mustér tenor ils principis digl uorden benedictin «ora et labora». El ha pia anflau ina veta che cumbinescha sias duas grondas pissiuns – per l'ina igl «ora», sia cardientscha, e per l'autra il «labora», la lavur en curtgin dalla claustra.

Ei ha denton buca cuzzau ditg che pader Murezi ei era seconcentraus sil meins enconuschent «lege». Quel fa en sesez era part dalla veta benedictina en fuorma da lecturas cuntinuontas. Pader Murezi ha denton approfondad quei «lege» en ina fuorma pli intensiva, numnadamein sco studi da teologia. Quel veva el buca previu da far, cura ch'el ei entras en claustra. Mo sin iniziativa da siu conventual pader Bruno Rieder ha el decidiu dad ir quella l'ingia via che ha menau el l'ordinaziun sa-

## «La cardientscha sa dar forza e plascher alla veta.»

Pader Murezi Casanova

cerdotala – ed a Vienna. Leu alla scola aulta dil convent Heiligenkreuz ha el numnadamein absolvii sui studi ch'ei la basa per l'ordinaziun.

### Nova veta per la baselgia

L'ordinaziun ei pia stada la conclusiun dad ina lunga fasa dalla veta da pader Murezi e per quei in punct culminont. El ei vegnius recepivs ellas retschas dils spirituals, ha reschiert il vestgiu da sacerdots ed empermess ch'el seigi promts d'administrar ils Sacraments e da perdegar igl evangeli. Per pader Murezi ei quei stau in mument da gronda muntada a plascher, sco el ha detg el plaid d'engraziament.

Igl ei denton buca mo stau in eveniment tut special per pader Murezi, mobein era per tut la baselgia catolica. Sco uestg Joseph Maria Bonnemain ha accentuau, detti l'ordinaziun da pader Murezi nova veta alla baselgia: «Il mund drova sacerdots che semetan el survetsch dil pivel e perdeghechan igl evangeli.»

Tonpli eis ei era stau ina fiasta da gronda impurtonza per la claustra da Mustér. L'ordinaziun da pader Murezi ei numnadamein stada l'emprima en claustra dapi quella da pader Paul Tobler igl onn 2018 e l'emprima d'in Romontsch dapi quella d'avat Vigeli Mom 1995. Ei fa pia buca surstar ch'uestg Joseph Maria Bonnemain ha astgau ordinar pader Murezi avon retschas bein pleinas dalla baselgia da S. Martin.

### Messas nuvialas

Gia dus dis suenter sia ordinaziun, dumengia ils 14 d'avrel 2024, ha pader Murezi tenui sia emprima messa nuviala, numnadamein quella en claustra. La proxima suonda dumengia ils 21 d'avrel 2024 en siu vitg nativ a Cumbel. Leu ha el lura la caschun da metter ses agens accents: «Jeu vi mussar che la cardientscha sa dar forza e plascher alla veta.»



Uestg Joseph Maria Bonnemain ha ordinau pader Murezi a Mustér en rama d'ina messa festiva e ha surdau ad el il vestgiu da sacerdot.



Agil aperitiv suenter l'ordinaziun ei pader Murezi staus in um tschercau.

## MEDEL/LUCMAGN



Il provediment d'aua dalla fracziun da Fuorns ei vegnius donnegiaus tras las malauras digl uost 2019.

FOTO RTR

## Sustegn finanziel per in niev provediment d'aua da Fuorns

La regenza grischuna garantescha alla corporaziun d'aua Medel/Lucmagn ina contribuziun da rodund 678 000 francs per construir in niev provediment d'aua da Fuorns. Ils cuosts totals ein calculai cun 2,26 milliuns francs.

### La retratga vegn translocada

A caschun dalla malaura dils 11 d'ost 2019 ei il provediment d'aua existent dalla fracziun da Fuorns vegnius donnegiaus fermamein. Las schaffadas ch'ei vegnidas donnegiadadas sesanflan ella Val la Buora, ina zona d'impurtonza nazionala.

Il provediment d'aua Medel/Lucmagn sco gestiunari ei per quei vegnius alla conclusiun ch'ei seigi il meglier da translocar la retratga ella Val Parada. Aschia sappi il provediment d'aua da Fuorns vegnir garantius a lunga veta ed a moda persistenta. Il project vegn realisau en duas etappas. (cdm/fmr)

## VELLA



Sco la foto dil cantun Grischun muossa, vegn il plaz da ballapei Bual engrondius en direenziun sid (mira zona melna).

FOTO © SWISSIMAGE

## Il plaz da ballapei astga vegnir engrondius

Glich verda dil cantun – Il plaz da ballapei «Bual» a Vella astga vegnir amplifiaus. Quei ha la regenza grischuna confirmau cun ina comunicaziun allas medias da gliendisdis endamaun.

Il plaz da ballapei da Vella ei atgnamein «memia pigns», silmeins tenor il reglement da ballapei. Per quei ha il menaschi da la liga pretendiu in engrondiment dil plaz.

Ultra da quai dat il cantun era glich verda per ina nova concepiun dils plazs da parcar a Davos Munts. Cun spustar il trafic da peduns vegn scaffiu ina colligiaziun pli attractiva e segira tochen si tier il lag da far bogn. (cdm/fmr)

## CORRIGENDA

## Othmar Schärer ei reelegius en suprastonza da Laax

Ell'ediziun da La Quotidiana dad ier gliendisdis, ils 15 d'avrel 2024 ha la FMR rapportau dalle elecziuns communalas dalla vischnauna da Laax. Per sbagl havein nus rapportau ch'il suprastont communal Othmar Schärer seigi buca vegnius reelegius en suprastonza. Quei ei falliu. Othmar Schärer ei vegnius reelegius cun 128 vuschs en suprastonza. La redacziun dalla FMR seperstgisa per quei sbagl. (fmr)

— FMR

|